

PITANJA I ODGOVORI

1. Ko može učestvovati na konkursu za osposobljavanje na radu koji se sprovodi u saradnji između Populacionog fonda Ujedinjenih nacija i kompanije dm drogerie markt BiH?

Na konkurs se mogu javiti sve nezaposlene žene koje imaju jedno ili više djece uzrasta do navršenih 7 godina starosti koje imaju registrovano mjesto boravka u jednoj od opština/općina gdje će osposobljavanje biti sprovedeno.

2. U kojim opštinama/općinama će osposobljavanje na radu biti sprovedeno?

Banja Luka, Banovići, Bihać, Bosanska Krupa, Bugojno, Cazin, Gračanica, Grude, Mostar, Novi Travnik, Orašje, Posušje, Prijedor, Prnjavor, Sanski Most, Sarajevo, Tuzla, Velika Kladuša, Visoko, Zenica i Zvornik

3. Šta ako živim u jednoj od navedenih općina/opština ali nisam registrovana u njoj?

Osobe koje žive u jednoj od navedenih opština/općina, a nisu registrovane u njoj, neće biti uzete u razmatranje jer zbog svog statusa ne bi bile u mogućnosti iskoristiti sve prednosti samog projekta osposobljavanja na radu.

4. Šta ako živim u jednoj od navedenih opština/općina, a registrovana sam u drugoj od navedenih opština/općina?

U slučaju da ste prijavljeni u jednoj, a živite u drugoj navedenoj opštini/općini, vaša aplikacija će biti uzeta u razmatranje. Međutim, u slučaju izbora za osposobljavanje na radu, morali bi ste se obavezati za usavršavanje u onoj opštini/općini u kojoj ste registrovani. Pošto bi to zahtjevalo putovanje izvan stvarnog mjesta boravka i dodatne troškove za izabranu korisnicu osposobljavanja na radu, očekuje se da bi sama aplikantica neuspješno prošla proces selekcije.

5. Šta ako živim sa suprugom i djecom u jednoj od navedenih opština/općina, ali suprug ima registrovano prebivalište u nekoj drugoj opštini/općini?

Mjesto registracije prebivališta supruga nije važno za sprovođenje ovog projekta sve dok porodica ima stvarno prebivalište u opštini/općini registrovanog prebivališta supruge.

6. U upitniku se navodi da se očekuje od izabranih korisnica projekta usavršavanja na radu opis djeteta/djece u predškolske ustanove. Šta to znači?

Jedan od ciljeva projekta je da se pomogne majkama djece predškolskog uzrasta da nađu vremena za uključanje na tržište rada. Do sada je prepoznato da je briga o djeci jedna od prepreka koja ženama onemogućava stupanje u radni odnos i sticanje vlastitog prihoda. Iz ovog razloga, primarni fokus je na ženama koje nisu u mogućnosti da priušte smještaj svog djeteta/djece u predškolske ustanove zbog nedostatka vlastitih prihoda. Ukoliko žena ima mogućnost čuvanja djeteta/djece od strane drugih članova domaćinstva (svojih ili suprugovih roditelja, starije djece u domaćinstvu ili članova šire porodice) ona se ne bi smatrala ugroženom kategorijom jer je i ranije bila u mogućnosti da organizuje čuvanje djeteta/djece i imala vremena da traži posao. Ovaj projekat ima isključivi fokus na majkama

koje su spremne da dijete upišu u predškolsku ustanovu (ili produženi boravak za djecu do napunjenih 7 godina starosti koja pohađaju prvi razred osnovne škole).

7. Na koji način je planirano da korisnicama usavršavanja na radu budu refundirani troškovi smještaja djece u predškolsku instituciju?

Da bi ostvarila povrat sredstava za smještaj djeteta u predškolsku instituciju, ili produženi boravak koji se koristi u istu svrhu, korisnica projekta treba da upiše dijete u bilo koju javnu ili privatnu predškolsku ustanovu u opštini/općini gdje ima registrovano prebivalište. Po ostvarenju usluga smještaja djeteta u predškolsku ustanovu, majke će samostalno platiti troškove ustanove te račun dostaviti Populacionom fondu Ujedinjenih nacija na refundiranje troškova. Refundiranje će se vršiti u iznosu od najmanje 100 KM od vrijednosti mjesečnog troška, gdje razliku do pune cijene predškolskog odgoja djeteta snosi sama korisnica iz naknade koju će primiti za usavršavanje na radu. Refundacija troškova će se vršiti na bankovni račun korisnice.

8. Imam više djece starosti do navršenih 7 godina. Da li za svako dijete imam pravo na refundaciju troškova smještaja u predškolsku ustanovu?

Korisnice imaju pravo na refundaciju troškova za svako dijete upisano u predškolsku instituciju ili produženi boravak za vrijeme trajanja projekta sve do navršenih 7 godina starosti djeteta. Djeca u ovu svrhu mogu biti upisana u različite institucije predškolskog obrazovanja ili produženi boravak.

9. Koji kriteriji će se koristiti za izbor korisnica pored prijave boravka u jednoj od navedenih opština/općina i dobrovoljnog smještaja djece predškolskog uzrasta u nekoj od lokalnih institucija?

Da bi usavršavanje na radu bilo moguće sprovesti, korisnice će morati imati minimalno srednju stručnu spremu III stepena što znači da korisnice sa završenom osnovnom školom i manje neće biti uzete u razmatranje. Pored školske spreme, fokus će biti na kategorijama teže upošljivog radno sposobnog stanovništva kao što su samohrane majke mada navedeni kriterij neće biti odlučujući.

10. Kako će proces izbora korisnica izgledati?

Da bi svaka aplikantica bila uzeta u razmatranje, potrebno je da popuni aplikacioni upitnik u potpunosti. Nije moguće preskočiti pitanja označena crvenom zvjezdicom (*). Nakon toga, sve aplikacije će biti pregledane i eliminisane iz daljeg procesa one koje ne zadržavaju osnovne kriterije prijave boravka, školske spreme i sl. U zavisnosti od lokacija aplikantica, biće kreirana lista za svaku lokaciju gdje će osoblje dm drogerie markt pozivati aplikantice na razgovor. U zavisnosti od rezultata razgovora za posao, kreiraće se rang lista korisnica i iste pozivati u projekat (maksimalno 30 majki). Ukoliko neka od aplikantica odustane od učešća u projektu na početku projekta, biće pozvana sljedeća najbolje rangirana aplikantica. Ukoliko do odustajanja iz projekta dođe u kasnijim fazama projekta, projekat će biti finaliziran sa preostalim brojem korisnica.

11. Koliko sati usavršavanja na radu je planirano za svaku izabranu korisnicu?

Usavršavanje na radu će trajati puna 3 mjeseca sa očekivanim početkom usavršavanja od polovine jula/srpnja 2023. Svaka korisnica će biti u obavezi da radi 30 sati sedmično tokom ovog perioda.

12. Da li će izabrane korisnice usavršavanja na radu primati neku naknadu za svoj radni angažman?

Svaka izabrana korisnica projekta će potpisati radni ugovor i biti regularno prijavljena u radni odnos sa kompanijom dm drogerie markt na period od tri mjeseca od početka usavršavanja na radu. Tokom ovog perioda, izabrane korisnice će ostvarivati prihod sa uključenim doprinosima u skladu sa ostvarenim brojem radnih sati/dana i u skladu sa skalom plata kompanije dm drogerie markt.

13. Šta ako budem izabrana u projekat i odlučim da ranije prekinem radni odnos?

U slučaju odustajanja, korisnici projekta će biti prekinut ugovor o radu i isplaćena plata do dana prekida ugovora. Također, korisnica će imati pravo na refundaciju troškova predškolskog obrazovanja djece do istog datuma. Samim prekidom radnog odnosa, korisnica gubi pravo na budući radni angažman u okviru kompanije dm drogerie markt.

14. Šta mogu očekivati korisnice projekta po završetku usavršavanja na radu?

Po završetku usavršavanja na radu, nije planirano produženje radnog odnosa korisnica u saradnji sa kompanijom dm drogerie markt. Međutim, pošto je kompanija dm drogerie markt u stalnom poslovnom rastu, postoji mogućnost da određenom broju korisnica usavršavanja na radu bude ponuđeno produženje radnog odnosa ili radni odnos bude ponuđen u narednom periodu u zavisnosti od razvojnih potreba kompanije.

15. Da li se od korisnica projekta usavršavanja na radu očekuje neko putovanje tokom trajanja usavršavanja?

Od svake korisnice projekta se očekuje da lično učestvuje u projektu usavršavanja na radu i dolasci na radno mjesto prema rasporedu rada kompanije. Korisnice neće imati mogućnost rada od kuće tokom navedenog perioda. Pored ovoga, Populacioni fond Ujedinjenih nacija i dm drogerie markt će krajem procesa usavršavanja na radu organizovati dvodnevnu radionicu koja će služiti za diskusiju sa korisnicama projekta i bolje razumijevanje njihovih i potreba drugih majki sa djecom predškolskog uzrasta za dugoročno ostvarivanje radnog statusa. Organizatori će biti zaduženi za organizaciju prevoza za sve korisnice do željene destinacije u Bosni i Hercegovini koja će naknadno biti odabrana. Također, svi troškovi ove radionice će biti plaćeni od strane organizatora. Prihvatanjem učešća u projektu, sve korisnice se obavezuju prisustvovati navedenoj radionici ukoliko nemaju opravdan razlog za izostanak (npr. bolest u trenutku održavanja radionice).

16. Da li se od korisnica projekta očekuje nastup ili korištenje njihovih izjava/fotografija u medijima?

Kako projekat nastoji da podijeli primjere dobre prakse i sa drugim poslodavcima i majkama širom Bosne i Hercegovine, želja nam je da sve izabrane korisnice imaju priliku i da se javno oglašavaju sa svojim stavovima, očekivanjima i rezultatima. Iako učešće u medijima nije obavezujuće, nadamo se da će bar jedan dio korisnica dobrovoljno pristati da podijeli svoju priču u javnosti na način koji bude naknadno dogovoren.